



NOSTRA SEGNORA DE CABU ABBAS.



Subra a un'altura, chi como d'òminat su logu in ue b'est sa zona industriale, ma chi unu tempus fiat logu de tancas birdes e de pastores, si agatat sa crèsia de Nostra Signora de Cabu Abbas.

Custu logu est semper istadu de importu mannu, lu testimòniat sa presèntzia de v'àrios sites nuràgicos: su nuraghe fortificadu Riu Mulinu o Cabu Abbas, su prus pagu connotu "Sa Tumba", e sa Tumba de Gigantes "Sa Tumba".

In perìodu romanu custu situ fiat giamadu "Caput Aquarum", ca dae s'abba nadia de su logu beniat alimentada totu sa rete de sa tzitade romana.

Sas testimoniantzias iscritas piu antigas chi connoschimus de sa presèntzia de sa crèsia sunt de su 1657, ma si pensat chi siat istada fraigada in època medievale e poi acontzada in su 1760 comente est iscritu in s'architave de s'intrada printzipale. Sos ùrtimos restàuros sunt istados fatos in sos annos 70 de su 1900, e cando nche est istadu bogadu su intùnigu s'est bidu chi su primu fràigu fiat meda prus minore de su de como e finiat prus a mancu in ue bi sunt sas duas arcadas in fundu a sa navada. Si podet notare chi sa crèsia est istada crèschida a pustis ca bi at tipos de pedras diversas meda tra issas e sunt puru istadas fraigadas cun tècnicas diversas. A cara a s'intrada secundària, chi si aberit a sud, cunservada in una teca bi est una istàtua de Nostra Segnora, sèmplitze ma bella meda; un'àtera istàtua cun Maria chi mantenet in bratzos Gesùs est posta a muru subra a su altare. Est incuadrada intro de una pala de linna, un'òpera de unu pintore de su logu chi rapresentat sos mistèrios de s'infàntzia de Gesùs. A parte fora, a curtzu a sa fatzada abbellida dae unu campanile a vela, bi est un'ossàriu antigu meda. Custa parte diat meritare de èssere signalada menzus, ca essende inghiriada solu dae unu muru bassu, zente meda la leat pro aiuola, e calicunu si bi setzet subra pro manigare.

A pagu tretu bi est unu campusantu chi no si impitat prus, s'ùrtimu interru est de su 1896, una batia chi si naraiat Gavina Mustazzu. A intendere sos contos antigos, fiat muzere de Gavinu Serreri, unu feminaju de sos tempos chi aiat àpidu 47 fizo cun chimbe fèminas diversas.

Sa festa benit fata su fine chida a pustis de Santu Simpliju, su patronu de Terranoa chi benit festadu su 15 de Maju, duncas o sa tertza o sa quarta domìniga de su mese.

Su chenàbura si che giughent sas banderas a domo de su priore; su sàpadu benint ritiradas sas banderas, si faghet una protzessione finas a sa crèsia e pustis su preìderu tzèlebrat sos ritos de su vèsperu. Su sero, su comitadu cumbidat sa chena a totus cun indàtaros a sa marinara e paninos cun purpu.

Sa domìniga benit fata una protzessione curtza e nada sa missa in onore de Nostra Segnora, a pustis su comitadu cumbidat a manigare a totus cun macarrones de pòddighe cun bagna e indàtaros a sa marinara.

A passadu mesu die colant sos de su comitadu cumbidende durches, binu e paninos cun su purpu.

Pro duas dies sa zente màndigat e bufat in amistade, e s'ispàssiat cun ballos e cantos.

